

Yëkkuö kit Pablo tö Éfeso wakpa a

Efesios

Pablo tö yëkkuö i' kit mik ie' bak Roma wötëulewā s'wöto wé a Jesús tté buaë pakè kuëkì e' ta. Ì bak ie' ta e' tso' kitule yëkkuö Hechos 28.17-31 e' kì. Pablo tö yëkkuö i' kit Jesús mik erblökwakpa tso' Éfeso ena ipamik e'pa a. E' kèwö ska' ta Éfeso dör ká bua'ie ena eë taië u tso' ì dalöieke ie'pa tö Skëköl skéie e' dalöioie. E' bua'ie dör ie'pa kéköl eköl kiè Artemisa e' dalöioie (Hechos 19.23-31). Mik Pablo shka' Jesús tté buaë pakök, etā ie' dē'mi Éfeso (Hechos 18.18-21). Erë eë ie' sené bërber è ta imineā. E' ukuökì ta iskà mineane ta isené eë duas mañal Skëköl tté kkachök. E' tso' kitule Hechos 19 kì.

Jesús mik erblökwakpa kè wā kabene ku' taië. E' kuëkì Pablo kè wā ì kite taië e' kì. E' skéie ì buaë tsākìe o' Skëköl tö se' a, ier buaë yè' siā e' batamik, e' kì ie' tö ikit kibiie. Ie' tö ichè tö e' kuëkì se' kawöta senuk Skëköl kíkokaie. E' kit ie' tö yëkkuö i' kì.

Jesucristo wa Skëköl tö se' ulitane tsātkè' Israel aleripa ena pè' ulitane, ñies e'pa er bua'wëitö ñi kì.

Shkë'wè

1 ¹Ye' dör Pablo. Skëköl wák er wa ye' dör Jesús ttekölpa tsá, e'pa eköl. Ye' tso' yëkkuö i' shtök s'batse'rpa e' tkëulewā darërë Cristo Jesús mik serke Éfeso, e'pa a. ²Skëköl dör S'yé ena Skëképa Jesucristo as e'pa er buaë chò ena sene bèrè mù a' a.

Skëköl tö se' tsātké Jesucristo batamik

³Skëköl dör Skëképa Jesucristo yé, e' kíkōkāsō taië. Se' batsulewā Cristo mik, e' kuëkì Skëköl er buaë ché se' a ì kōs buaë tso' ie' wā ká jai a e' wa. ⁴Kām ie' tö ká i' yuò, e' yökì se' shukitbakitō as se' dō batse'r, kè kì ì sulu tā' yès ie' wōā, se' batsulewā Cristo mik e' batamik. Ie' éna se' dalër taië, ⁵e' kuëkì ie' tö ibikeitsbak tö se' tseratköitō ila'rie Jesucristo batamik, e' kiane ie' wák kì, ñies e' tö ie' ttsë'wëke buaë. ⁶Ie' tö iwé es as

se' tō ie' k̄ik̄ōk̄a michoë ie' er buaë ché se' a tajë sh̄utë e' kuëk̄i. E' k̄os w̄é ie' tō ilà dalër tajë ie' éna, e' batamik. 7-8 Cristo k̄otëw̄a se' sk̄éie, ie' pé tēne, e' wa se' yēnētts̄a s̄ene sulu ulà a ena se' nūi olo'yé Sk̄ék̄öl tō se' k̄i. E' wa se' isūtë tō ie' er buaë ché tajë sh̄utë se' a. N̄ies ie' tō er̄bikè buaë më se' a as ì weke ie' tō e' wà ar se' a. 9 Ì bikeitsbak ie' tō w̄ë, e' waw̄ëitō ì o' Cristo tō e' batamik. Kuaë t̄a iblè'w̄aitō sultane yōk̄i, erè iwà kkachéitō se' a. 10 Ie' ibikeitsbak tō mik ik̄éw̄ö de, et̄a ie' tō Cristo tkerak̄a íyi ulitane tso' k̄á jai a ena k̄á i' a e' wōk̄irie.

11 Ì k̄os weke Sk̄ék̄öl tō, e' weke ie' tō iwák er wa w̄es ie' k̄i ikiane es, w̄es ie' tō ibikeitseke es. Es sa' dör judiowak e'pa sh̄uk̄itbak ie' tō as sa' dō ie' ichaie, sa' batsulew̄a Cristo mik e' batamik w̄es ie' tō ibikeitsbak es. 12 Ie' tō iw̄é es as sa' er̄blè' k̄ewe Cristo mik e'pa tō ie' olo tajë e' k̄ik̄ōk̄a. 13 Es a' n̄ies, mik a' tō s'ts̄at̄kè tté buaë mok̄i e' t̄tsé t̄a a' er̄blè imik, et̄a a' b̄ats̄ew̄a Cristo mik ena Wik̄öl Batse'r muk ikablè' e' méitō a' a iwà kkachōie tō a' dör ie' icha. 14 Wik̄öl Batse'r tso' se' a, e' dör iwà kkachōie tō ì k̄os yè' Sk̄ék̄öl tō tō imeke, se' dör ie' icha, e'pa a aishkuō t̄a, e' meraëitō se' a. E' kuëk̄i se' w̄a ijcher tō ie' tō se' ts̄at̄keraë da'a. E' kuëk̄i ie' olo t̄a' tajë, e' k̄ik̄ōk̄asō.

Pablo tté Sk̄ék̄öl t̄a Éfeso wakpa k̄i

15 E' kuëk̄i, mik ye' tō a' tté t̄tsé tō a' er̄blōke mok̄ië Sk̄ék̄ëpa Jesús mik, n̄ies mik ye' itt̄sé tō s'batse'r malepa k̄os dalëritseke a' tō tajë, 16 e't̄ami w̄estela yè'miyō Sk̄ék̄öl a a' dalërmik k̄ekraë mik ye' ttōke ie' t̄a et̄a. 17 Ie' dör Sk̄ék̄ëpa Jesucristo e' K̄ék̄öl. Ie' dör S'yé olo t̄a' tajë e'. Ie' a ye' tso'ie ikiök tō ie' tō a' k̄imè iWik̄öl wa as ie' íyi wà ar buaë a' éna, n̄ies as a' w̄a ijcher bua'iew̄a tō yi dör ie'. 18 Ie' tō se' kl̄ōö' ikablè' se' a e' wà panuk kröröë. E' tso' ie' w̄a më se' dör ie' icha batse'rpa esepa a. Ye' tso'ie ie' a ikiök tō a' er n̄i'úitō as k̄os kablè n̄e' bua' dör ena olo dör e' wà ar a' éna. 19 Ie' diché t̄a' tajë íyi ulitane ts̄at̄a. Ì k̄os ormi ie' a. Idiché e' wa ie' tso' se' er̄blōke Cristo mik, e'pa k̄imuk. Ye' tso'ie ikiök ie' a tō a' er n̄i'úitō as e' k̄os wà ar bua'ie a' éna. Diché e' dör tajë sh̄utë, 20 e' wa Cristo k̄otëw̄a, e' sh̄keō'kane ie' tō. Diché e' wa ie' tō Cristo tk̄ék̄a k̄á jai a iulà bua'kka íyi ulitane wōk̄irie. 21 Eë Cristo tk̄er̄k̄a diché t̄a' tajë íyi wōkir, íyi wák, íyi k̄ék̄öl w̄a diché t̄a', ese k̄os ts̄at̄a. Ie' tk̄enek̄a íyi ulitane ts̄at̄a. Ie' dör ì k̄os tso' ì n̄e t̄a ena aishkuō t̄a e' ts̄at̄a. 22 Sk̄ék̄öl tō ì k̄os méw̄a ie' kl̄ò dik̄iã. N̄ies ie' tō imék̄a se' dör ie' icha e'pa k̄os wōk̄irie. 23 Se' dör w̄es Cristo wák ch̄kà es, t̄a ie' dör w̄es s'wōkir es. Ie' tō se' w̄ett̄seke ì k̄os kiane ie' k̄i w̄é k̄á i' k̄i, e' uk̄. Ie' tso' k̄á wa'n̄e, k̄è ì a ie' wōkl̄önuk.

Sk̄ék̄öl er buaë ché se' a se' ts̄at̄koie

2 1 Kam a' er̄blò Cristo mik, e' yōk̄i a' bak e' wamblök suluë, e' kuëk̄i a' bak w̄es s'duulew̄a es Sk̄ék̄öl a. 2 E' k̄éw̄ö ska' t̄a a' bak s̄enuk

suluë wës wépa kè tò Skèköl dalöiè esepa ser es. Wimblu sulusi dör ì sulu kôs tso' ká i' a e' wökir e' tò iütök a' bak. Ie' tso' Skèköl ttè dalöseukwá wakpa esepa wörieikök. ³Se' kôs bak senuk wës ie'pa es. Ì sulu kôs kiane s'wák dër suluë e' kî wamblè, ese wamblök se' bak. Se' erbikè sulu, e' è wà wamblök se' bak s'wák ttsè'wojie buaë. Se' bak wömeulettsá weinuk Skèköl ulà a wës pè' malepa es. ⁴⁻⁵Se' bak duulewá se' nuì kî, erè Skèköl tò se' suè er siarè wa taië. Ie' tò se' dalëritsé taië. E' kuekî ie' tò sene michoë mé se' a. E' dör wës ie' tò se' shke'wékane Cristo ta es. Ie' er buaë ché se' a taië, e' kuekî se' tsatkène. ⁶Se' batsulewá Cristo Jesús mik, e' kuekî e' dör wës Skèköl tò se' shke'wékane Cristo ta ñita es. Ñies ie' tò se' tkéka Cristo ta ñita ká jaì a. ⁷E' kôs wé ie' tò es iwà kkachöie aishkuò ta tò kôs ie' er buaë ché se' a ì wé Cristo Jesús tò se' dalërmik e' batamik. E' dör taië shute kè wöet ta' ekkè. ⁸⁻⁹Skèköl er buaë ché a' a, e' batamik a' tsatkène, a' erblöke Jesucristo mik e' kuekî. E' kè dör ì buaë wé a' tò ie' wörkî ese skéie. Ie' tò a' a imé éme wës íyi kadmè es. Ie' tò iwé es as kè yi e' ttsòka tò ie' tsatkée ì buaë wéitö ese batamik. ¹⁰Ie' tò se' er mane'wé pa'alí se' batsulewá Cristo Jesús mik e' batamik. Ie' tò iwé es as se' tò ì buaë kôs ese ù. E' kôs bikeitsbakitö as se' ser wës ie' kî ikiane es.

**Judiowak ena wépa kè dör es, esepa de wës
wák eköl è es Cristo batamik**

¹¹A' wépa kè dör judiowak, kè a' éna ichökwa tò wës a' bak kam a' erblö Cristo mik e' yökî. Judiowak wépa kôs esepa tottola kkuölit tëule tsir iwà kkachöie tò ie'pa dör Skèköl icha. Pè' kè dör judiowak, esepa kiè ie'pa tò tottola kkuölit kè tëule ese wakpa. Es ie'pa tò a' cheke suluë. Ie'pa a a' dör ná. ¹²A' éna íanú tò a' bak e' butsulettsá bánet Cristo yökî. A' kè bak Israel aleripa shüa. Ì uk Skèköl kablé' ie'pa a ena ttè mène ie'pa a tsakië e' shüa a' kè bak. A' bak senuk ká i' a Skèköl chók kè ta', kè a ì paneta'. ¹³Erè íñe ta' a' batsulewá Jesucristo mik. E' kuekî a' dewá Skèköl ska' buaë, Cristo Jesús kötewá a' skéie, ie' pé' tène a' tsatkoie, e' batamik.

¹⁴Cristo tò judiowak ena pè' kè dör judiowak, esepa er bua'wé ñi kî. Se' bak ñi bolökpaie, erè Cristo tò se' er bua'wé ñi kî. Ie' tò se' woiéwá ká etkè wakpaie. Ì tò se' wé ñi bolökpaie ese shulé ie' tò ikötewá krus mik se' skéie e' wa. ¹⁵Ttè me'atbak Skèköl tò judiowak a dalöiëno, e' tò se' me'ka ñi bolökpaie. Erè Cristo kötewá se' skéie e' kuekî ttè e' kôs kè diché ta'ia. Skèköl tò iwé es as sa' dör judiowak ena a' kè dör judiowak, e'pa dò ñi yamipaié batsulewá Cristo mik wës wák eköl è es. Es ie' tò se' er bua'wé ñi kî. ¹⁶Ì tò se' wé ñi bolökpaie, ese shulé Cristo tò. Ie' kötewá krus mik se' skéie, e' wa ie' tò Skèköl er bua'wé judiowak kî ena pè' kè dör judiowak esepa kî. Es se' de wës wák eköl è es Skèköl a. ¹⁷Sene bèrè Skèköl ta, e' ttè buaë pakök Cristo de, pè' kè dör judiowak e' butsulettsá bánet Skèköl yökî, esepa a, ñies judiowak kè e' butsulettsá bánet esepa a.

18 Cristo batamik se' kōs dōwami buaē S'yé ska', iWikōl dōr ekōl è, e' wa. 19E' kuēki i'ñe tã a' kè dōr wēs kã kuā'kī wakpa es. A' de s'batse'rpa kíie. Ñies a' de Skèkōl ala'rie. 20Se' dōr wēs u es. Jesús ttekōlpa tsã ena Skèkōl ttekōlpa, e'pa dōr wēs u kukulēwō es. Jesucristo wák dōr wēs u chkí es. 21Cristo dōr u wōklō'ukwak. Se' kōs dōr u e' yese alè. Cristo batamik u e' yōrmir dō ide u etkue batse'r Skèkēpa a ekkè. 22Se' batsulewã Cristo mik, ñies se' batsulewã ñi mik, es se' kōs dō wēs Skèkōl wé es, e' a Skèkōl serke iWikōl wa.

Pablo klōne Cristo tté pakōk pē' kè dōr judiowak esepa a

3 1Ye' wák tso' wōtēulewã s'wōto wé a Cristo Jesús tté pakè kuēki a' kè dōr judiowak esepa kīmoie. Skèkōl er buaē ché a' a taijē, e' kuēki ie' a ye' tso' ikiök a' kī. 2Ye' wa ijcher tō a' wã ittseüle tō Skèkōl er buaē ché ye' a, e' kuēki ie' tō kanè i' me' ye' a Jesús tté pakōk a' kè dōr judiowak esepa a. 3Ibikeitsbak Skèkōl tō wè, e' blē'waitō erè iwà kkayē'itō ye' a. E' wã shtétke ye' tō a' a yēkkuō i' kī bōt mañat. 4Yēkkuō i' sué a' tō, etã a' éna iwà armi tō Cristo tté blēulewã se' yōkī kuaē, e' wã ane ye' éna buaē. 5Ibikeitsbak Skèkōl tō wè Cristo batamik, e' blēulewã kuaē. Erè i'ñe tã ie' tō iwà kkaché iWikōl wa sa' dōr Cristo ttekōlpa tsã e'pa a, ñies Skèkōl ttekōlpa batse'r e'pa a. 6Ttè e' blēulewã se' yōkī kuaē, e' wã dōr i' es: A' kè dōr judiowak, esepa kieke Skèkōl tō Jesús tté buaē e' wa as i kōs tso' ie' wã mè sa' a, e' mùitō a' a ñies, as a' dōñak sa' tã ñita wēs wák ekōl è es, as i kōs muk Skèkōl kablè' sa' a e' dō a' ulà a ñies, a' batsulewã Cristo Jesús mik e' kuēki. 7Skèkōl er buaē ché ye' a, e' kuēki ie' diché wa ie' tō ye' me'kã ttè buaē ñe' wakanéuk.

8S'batse'rpa kōs, e' sulula ye' dōr. Erè Skèkōl er buaē ché ye' a, ie' tō ye' shushté Cristo tté buaē e' pakōk pē' kè dōr judiowak esepa a. Ì tso' Skèkōl wã ie'pa a Cristo batamik, e' dōr buaē shute, kè se' a iwà bikeitsuk ekkè. 9Ñies i bikeitsbak Skèkōl tō wè Cristo wa, e' wã pakōk sulitane a ie' tō ye' patké. Ttè e' bak blēulewã kã iaiãè, ie' dōr íyi ulitane yuōkwak e' wã. 10Ie' kè wã ikkayēne yi a kã iaiãè tã, ie' tso' se' dōr Skèkēpa Jesús icha e'pa panuk e' kuēki. Se' wa ie' tō iwà kkaché i'ñe tã íyi wōkir ena íyi wák tso' kè wértã'wã ese kōs a as ie'pa éna iar tō ie' siwã' dōr iskië tsakië íyi ulitane tsata. 11E' kōs wé ie' tō Cristo Jesús dōr Skèkēpa e' wa, wēs ie' tō iwà yōbië e' bikeitsbak es. 12Se' batsulewã Cristo mik, se' erblōke ie' mik, e' kuēki se' dōmiwã buaē ttök ie' tã kè suarta', kè wōklōr i a. 13Ye' weirke kōs a' dalèrmik, e' wa a' ké e' ttsökka. E' kuēki ye' tō a' a ichè tō kè a' e' siaukwã.

Pablo tténe Skèkōl tã Éfeso wakpa kī

14Íyi ekkè kōs kuēki ye' e' tkéwã kuchè kī S'yé wōrkī ttök ie' tã. 15Ì kōs dōr ttsè'ka kã jai a ena kã i' a, e' tso' ie' è batamik. 16Ie' olo tã' taijē shute,

e' a ye' tō ikieke tō ie' tō a' er diché iò iWiköl wa. ¹⁷Nies ye' tō ikieke ie' a tō Cristo mú ser a' er a, a' erblöke ie' mik e' kuekí. Ye' tō ie' a ikieke tō a' e' tkòwà darèrèè ñi dalèritsök ñies Skèköl dalèritsök. ¹⁸Ye' tō ikieke ie' a es as a' ena s'batse'r malepa, e'pa kòs éna iwà ar tō kòs Cristo éna se' dalèr, e' dör taiè, shoè, batsiè, kàkkeè, iskiè, kè enukwa. ¹⁹Ye' kí ikiane tō a' éna iwà anù buaè tō kòs Cristo éna se' dalèr, e' tkòka kòs se' kabikeitsò e' tsata. Es ye' kí ikiane as a' ser buaè yèsyèsè, kabikeitsò buaè mokiè wes Skèköl wák es.

²⁰Skèköl diché ta' taiè, e' tso' iwakanéuk se' er a. Ie' tō i buaè wèmi se' a, i kòs kiekèsò ena i kòs bikeitsekesò e' tsata, e' kuekí ie' kíkòkasò. ²¹As Skèköl kíkòka se' dör Skèkèpa Jesús icha e'pa tō. Nies ikíkòkasò Cristo Jesús kuekí kekraè. Es e' idir.

Se' dör wes ñi yamipa es Wiköl Batse'r wa

4 ¹Ye' tso' wötèulewà Skèkèpa Jesús ttè kuekí. Skèköl er buaè ché a' a' taiè Cristo batamik, e' kuekí ye' kkòchò a' a tō a' senú buaè yèsyèsè wes Skèköl tō a' klò'o'bak senuk es. ²A' e' wóowa bèrè, a' senú buaè ñita kè kèsik wa. A' ñi dalèritsò, ñies a' ñi dalè'ttsò er bua' wa. ³A' kòs dör wes ñi yamipa es Skèköl Wiköl wa. A' e' chó darèrè as a' kè ñi blabatsòlor ñi yöki. A' senú bèrè ñita. ⁴Se' kòs dör wes wák eköl è es. Skèköl Wiköl tso' se' ta' e' dör eköl è. Skèköl tō se' kòs klò'o' as se' ser michoè ie' ta, e' wà paneke se' kòs tō ñita ttsè'ne buaè wa. ⁵Se' Kèköl dör eköl è, ttè mik se' erblöke e' dör etkè. S'wòskuè etkè a' se' ulitane wòsune. ⁶Skèköl dör eköl è, e' dör se' ulitane yé. Ie' dör se' ulitane wòkir. Ie' tso' iwakanéuk se' ulitane wa, ñies ie' tso' se' ulitane ta.

⁷Se' kòs dör wes wák eköl è es, erè Cristo tō imé se' a' eköl eköl kanebloie ie' a' kuà'kí kuà'kí wes ie' kí ikiane es. ⁸E' dör wes itso' kitule Skèköl yèkkuò kí es, e' tō ichè:

“Mik ie' e' aléka ibolökpa kí
etá ie' míkane ká jai a.

Ibolökpa klò'wéwaitò taiè, e'pa mítser iwa e' ta,
ñies i buaè méitò iwakpa a.”^a

Es Skèköl yèkkuò tō ichè.

⁹Wé ichéitò tō “ie' míkane kákke”, etá zima e' wà dör? E' wà dör tō ie' dè'rò kewe ká dià kaska'. ¹⁰E' wà kiane chè tō ie' dè'rò ká dià kaska', e' è mine'kane ká jai a' íyi ulitane tsata ká kòs wà ioie ie' olo taiè e' wa.

¹¹Cristo tō diché mé se' a' eköl eköl kanebloie ie' a. Se' welepa shushtë ie' tō kaneblök ie' a' ittekölpa tsáie. Se' welepa skà shushtë ie' tō Skèköl ttekölpaie. Se' welepa skà shushtë ie' tō ittè buaè pakòkwakpaie. Se' welepa skà shushtë ie' tō ittè klò'ukwakpa wòkirpaie

^a 4.8 Salmo 68.18

ena s'wöbla'ukwakpaie ittè wa. ¹²Esepa kanè dör s'batse'r malepa kòs wöbla'uk kanèblök buaè ie' a ena ñi kìmuk buaè. Se' serke wës ie' kì ikiane es, e' tã se' kòs dör wës Cristo chkà es, e'pa er diché kì iërdaè Cristo ttè a. ¹³Es se' kòs döraè erblök ñikkèè Jesús dör Skèköl Alà, e' mik. Ñies se' kòs wã ijcherdaè ñikkèè se' er a tò wës ie' dör. Se' döraè wës wëm kibineone es. Se' serdaè buaè yësyësè wës Cristo es. ¹⁴Es se' kè döpaia wës alala es kītēr tottola ttè ulitane wa. Esepa dör wës dichàwö ppé siwã' tò es. S'wöbla'ukwakpa kache ttè wa, e'pa erbikò taië, ie'pa tò ttè pa'alì yuèmi s'kītö'woie. Mik se' kibine Cristo ttè a, etã ese kè kītöonukia yì a. ¹⁵Kè se' e' muktsã kītö'wè kache ttè wa. E' skéie ttè mokì, ese chekesò ñi a se' ñi dalèritsò e' kuekì. Se' tò iwé es, etã se' diché iërke buaè Cristo dör s'wökir, e' ttè kòs a. ¹⁶Cristo batamik se' kòs dör wës s'chkà es. S'chkà a s'dichéwö tso', s'kicha tso' ena s'yese skà tso' tsàkië, e' kòs tso' iëulewã buaè ñikkèè, kanèblöke buaè ñikkèè ñita. Es se' dör taië, e'pa kanèblöke Cristo a eköl eköl kanè dör kuã'kì kuã'kì, erè Cristo batamik se' dör wës chkà etkè es, iëulewã buaè ñita, kanèblöke buaè ñita. Es se' mir buaè, ñi kì diché iöke buaè ñikkèè ñi dalèr wa.

Kè se' senukia wës pè' kè tò Skèköl dalöie es

¹⁷Skèkèpa Jesucristo ttò wa ye' tò a' a ichè tò kè se' seriã wës pè' kè tò Skèköl dalöie ser es. Ì kòs bikeitseke ie'pa tò, e' wã kè dör ñie bua'. ¹⁸Ie'pa erbikè tssenewatke. Skèköl ttè mokì, e' wã kè ane ie'pa éna yës. Ie'pa er darèrèè, e' kuekì sene mokì meke Skèköl tò se' a, e' kè dè' ie'pa ulà a. ¹⁹Ie'pa er burinewã. Ie'pa e' mettsã ì sulu kukuétökwã darèrèè. Ie'pa e' ia'uke sene sulusi wa, kè e' wöklö'uta' yës.

²⁰Erè Cristo ttè kè wa se' wöblane senuk es. ²¹Mokì a' tò ie' ttè ttsé, a' e' yué ie' ttè mokì wa. ²²E' kuekì se' bak senuk suluè, ese kòs olo'yösö. Ñies se' wák dèr suluè, e' olo'yösö. E' tò se' kītö'weke ì sulu wamblök. Se' tò iüté es, e' tã se' er sulurdawã. ²³Erè se' erbiköne kuã'kì buaè yësyësè. ²⁴Skèköl tò se' wák dèr suluè, e' mane'wéttsã pa'alì wës ie' wák es, e' kuekì se' senù yësyësè ena batse'r wës ttè mokì tò ichè es.

²⁵E' kuekì a' kè kachökia ñi kì. Se' kòs dör wës wák eköl è es, e' kuekì ì cheke a' tò ñi a, e' chó ttè mokì wa.

²⁶A' ulune, e' tã kè iwã wamblar. A' er buanúne kam katuirwã e' yöki. ²⁷Kè kawö mar bé a as ie' tò a' kò ì sulu wamblök.

²⁸Yi bak akblök, e' kè akblökia. E' skéie ese kanèbló iwák ulà wa as iulà a iwã dò tã ikakmèitò s'siarèpa a.

²⁹Ttè sulusi kè charia. E' skéie a' tò ttè buaè ese è chó s'malepa kukua as ie'pa kì er tòwã Skèköl mik darèrèè. Es a' tò ie'pa kìmèmi buaè mik ie'pa kì ikiane etã. ³⁰Skèköl tò iWiköl me' se' a iwã kkachöie tò se' dör ie' icha. Es se' wã ijcher mokì tò Skèköl tò se' bleraè buaè dò mik se' tsatkèrdattsa aishkuö tã, e' kèwö ska' tã. E' kuekì kè ì sulu wamblaria as

Wiköl Batse'r kè eriar. ³¹Kè a' kèsik blökiä ñi kị. Kè a' ñi saukia suluë. Kè a' ulunukia ñi kị. Kè a' wõnanukia ñi kị. Kè a' ñi chökiä suluë. Ese kos olo'yó. ³²E' skéie ì buaë è ú ñi a. A' ñi saú er siarë wa. Ì sulu wambleke a' tò ñi kị, ese nuí olo'yó ñi kị wes a' nuí olo'yé Skèköl tò a' kị Cristo batamik es.

5 ¹A' dör Skèköl ala'r dalër taië ie' éna, e' kueki a' senú buaë yësyësë wes ie' ser es. ²A' ñi dalëritsó kekraë wes Cristo tò se' dalëritsë es. Ie' e' mettsa ttëwä se' skéie. E' wër buaë Skèköl wa wes íyi mekesö ie' a ala'r buaë masmas es. ³A' senú wes s'batse'rupa ké senuk es. Kè a' kàne trënu. Kè a' kàne e' ia'ukka sene sulusi wa. Kè a' kàne íyi kkechök. Íyi ese yöki a' e' kkö'nú bua'iewä as kè yi tò a' kkatò iki. ⁴Ttè sulusi kos, ttè kè wà ta' kos, ttè tsuleie kulüie kos, ese kè char. E' skéie Skèköl è kíkóka. ⁵A' wä ijchenú buaë tò wépa trërke ena wépa tò íyi sulusi wambleke, ñies wépa tò íyi kkecheke (e' dör wes íyi diököl dalöie skèkölíe es), esepa kos kè dòpa ì blúie Cristo ena Skèköl e'pa tso' e' a.

Sene buaë yësyësë

⁶Íyi sulu ekkë kos kueki wépa tò Skèköl ttè dalösewéwä, esepa kị Skèköl kèsik ardaë. E' kueki kè a' e' muktsa yi a kitö'wè ttè kè wà ta' ese wa. ⁷Kè a' e' tiük ie'pa esepa ta, a' e' skó ie'pa yöki bánet. ⁸A' bak senuk suluë, e' dör wes a' bak senuk ká ttsettsë a es. Erë ì'ñe ta' a' tso' batsulewä Skèképa Jesús mik, e' dör wes a' serke ká ñi a es. E' kueki a' senú wes s'ser ká ñi a es. ⁹S'serke wes ká ñi a es, esepa er buaë, ser yësyësë ena ttö mokjè. ¹⁰A' e' chó e' wöbla'uk ì wër buaë Skèképa wa ese wa. ¹¹⁻¹²Ì sulu wambleke wépa ser wes ká ttsettsë a es, esepa tò, ese kè dör iie bua'. Ì sulu wambleke ie'pa tò akirie, ese pakè tò s'jaëwè ekkë. E' kueki kè ì sulu wamblaria yës wes ie'pa es. E' skéie ì buaë kí ú kekraë. E' tò ie'pa a ikkachèmi tò ì wambleke ie'pa tò e' dör suluë. ¹³⁻¹⁴Erë ká ñiwe tò íyi ulitane kkachëwä buaë mía ñiweie. E' kueki mik ì sulu wambleke ie'pa tò e' kkachésö ie'pa a, e' ta' ie'pa welepa éna iarimi tò e' dör suluë ta' ier mane'umi ta' imía ser buaë wes ká ñiwe wakpa es. E' kueki ttè tò ichè ì' es:

“A' dör wes s'kapötkëter es, esepa tì'nú,
a' dör wes s'duulewä es, esepa shkenúkane,
etä Cristo tò a' er ñi'weraë.”

¹⁵E' kueki a' ser kkö'nú a' tò. Kè a' senukia wes wépa kè er ta' esepa ser es. E' skéie a' senú yësyësë. ¹⁶Taië pè' tò íyi sulu wambleke ì'ñe ta, e' kueki ì buaë ormi se' a, e' ta' iüsö kos se' a iormi ekkë. ¹⁷Kè a' senuk wes kè se' erbiköta' buaë es. Erë ì kiane Skèképa Jesús kị tò se' tò iwè, ese wà anú a' éna. ¹⁸Kè a' e' ttökkaiä blo' wa yës. E' tò s'sulu'wëkewä da'a. E' skéie a' senú buaë yësyësë kekraë Wiköl Batse'r diché wa. ¹⁹Mik a' ñi dapa'uke, etä a' tso' ñitá Salmo wa ena Skèköl ttsé wa, ñies ttsé meke

iWiköl tō a' a ese wa. A' ttsó Skököl a ikökokaie a' er kos wa. ²⁰Wéstela chó kekraë Skököl dör S'yé e' a Skökëpa Jesucristo ttō wa.

Wes se' ké senuk ñita

²¹Cristo dalöieke a' tō, e' kuëki a' ñi dalöiö. ²²Alakölpa ké iwëpa dalöiök wes ie'pa tō Skökëpa dalöieke es. ²³Alaköl wëm dör ie' wökir wes Cristo dör ie' ichapa wökir es. Ie' dör ie'pa tsatkökwak. Ie'pa dör wes ie' chkä es. ²⁴E' kuëki alakölpa ké iwëpa dalöiök ì kos a wes wëpa dör Cristo icha esepa tō ie' dalöieke es.

²⁵A wëpa, a' alakölpa dalëritsó wes Cristo tō se' dör ie' icha esepa dalëritseke es. Ie' e' mettsa ttëwä se' skéie. ²⁶Ie' tō iwé es se' batse'woie. Ie' tō se' paiklé ittè wa as se' dō maneneë Skököl wöa. E' wä suëkesö mik se' wösune etä. ²⁷Ie' tō iwé es as se' dō ie' wák wörki batse'r, kè ki ì sulu ta' yës, olo ta' taië wes alaköl ulabatsöketke es, ese paiëule buaë, kè iauleka, idatsi' kè wöklialeka. ²⁸⁻³⁰Es ñies wëpa ké ilakölpa dalëritsök wes ie'pa e' dalëritsò es. Kè yi e' sauta' suluë. E' skéie se' e' kkö'nü buaë, e' tiö buaë. E' kuëki wëm tō ilaköl dalëritseke, e' wa ie' wák e' dalëritsò. Es ñies se' dör Cristo icha, e'pa dör wes ie' chkä es, e' kuëki ie' tō se' kkö'neke buaë. ³¹Itso' kitule Skököl yëkküö ki ì es: “Wëm kè serpaia iyé ena imì e'pa dapömik, e' skéie iserdawä ilaköl ta. Ie'pa bøl serdaë ñita ta ie'pa mia wes wák eköl è es.”^b ³²Ttè e' dör taië iskië, kè se' éna iwä ar bet. Erë ye' a ta, ttè e' tso' Cristo ena se' dör ie' ichapa e'pa chök. ³³Erë ñies ttè e' tso' se' a ichök tō wëpa kos ké ilakölpa dalëritsök wes iwákpa e' dalëritsò es. Ñies alakölpa kos ké iwëpa dalöiök.

6 ¹A ala'rla, a' yé ena a' mì, e'pa ttō dalöiö Skökëpa Jesús dalërmik, e' dör buaë yësyësé e' kuëki. ²⁻³Ttè dalöiëno me'atbak Skököl tō e' et tō ichè: “A' yé ena a' mì e'pa dalöiö. A' tō iwé es, e' ta a' kawö tköraë buaë ena a' serdaë ká taië ká ì ki.”^c Ttè e' dör ttè dalöiëno tsá kablé se' a ilè uk iütè skéie e'.

⁴A' dör ala'rla yéwöpa ena imiwöpa, kè a' tō a' ala'r uluukka. E' skéie ie'pa tala'ú buaë, ie'pa shuló er bua' wa. Ñies ie'pa wöbla'ú Skökëpa Jesús ttè wa.

⁵A' klöulewä kanè mésoie, a' wökirpa tso' ká ì ki, e'pa ttō iütó er mokì wa. Ie'pa dalöiö suane wa painè wa. A' kanebló ie'pa a buaë wes a' chöpa kaneblök Cristo a es. ⁶A' kanebló buaë ie'pa a kekraë, kè dör mik ie'pa tō a' suëke e' è ta ie'pa wökatoie tō a' dör kanè mésopa buaë ese. Mokì a' dör Cristo kanè mésopa, e' kuëki a' kanebló ie'pa a kaneë wes Skököl ki ikiane es. ⁷A' kanebló ie'pa a kaneë wes Skökëpa Jesús wák a s'kaneblò es, kè dör wes s'kaneblò s'ditsò a es. ⁸A' wä ijcher tō wëpa tso' klöulewä kanè mésoie ena wëpa kè dör es, esepa kos a Skökëpa Jesús tō iské meraë eköl eköl wes ì buaë wésö es.

^b 5.31 Génesis 2.24 ^c 6.2-3 Deuteronomio 5.16

⁹A' dör kanè wökirpa, a' kanè mésopa dalöiö ñies. Kè ie'pa pañnar. A' éna ianú tò a' ena ie'pa, e'pa kōs wökir dör Skëköl tso' ká jaì a e'. Se' kōs kawōtā ie' ttè dalöiök. Se' dör kanè wökirpa ö se' dör kanè mésopa èsepa, esepa kōs dör ñies ème ie' a.

Se' e' tsatkò bé yöki

¹⁰A yamipa, ibataie tã ye' tò a' a' icheke tò a' e' diché ió kēkraë a' batsulewã Skëkëpa Jesús tã e' wa, ñies ie' diché taië e' wa. ¹¹Ì kōs mé Skëköl tò a' a' e' tsatkoie ì sulu yöki, e' dör wēs ì kōs tso' ñippökwaqpa wã e' tsatkoie es. E' ió a' tò as a' e' tsatkò, e' wa a' e' tkōwã darèrè bé éna se' kitò'wak e' yöki. ¹²Kè se' ñippökü' s'ditsö tã. E' skéie se' ñippöke íyi sulusi diché tã' kè wërta'wã esepa tã. E'pa dör íyi wökir ena íyi wák tso' ì sulu kōs tso' s'pamik wēs stui a' es ese wëttsuk. ¹³E' kuëki ì kōs mé Skëköl tò a' a' e' tsatkoie, e' ió a' tò, e' klö'ú as mik ì sulu datse a' erkiöuk ì sulu wamblök, etã a' a' iwöklör. A' tò iwé es kēkraë, e' tã a' e' alörakã ì sulu kï tã a' a' e' tkërdawã darèrè mokië.

¹⁴E' kuëki a' tso' erki ñippök ì sulu tã. Skëköl ttè moki e' klö'ú a' tò, e' dör wēs ñippökwaqpa kipamo es. A' senú yësyësë Skëköl a, e' tò a' kimeræ wēs íyi daloie ieke ñippökwaqpa tò ibatsi' kï e' tsatkoie es. ¹⁵Skëköl tò a' er bua'wëne ie' kï Cristo batamik, e' ttè buaë klö'wé a' tò, e' dör a' a' wēs ñippökwaqpa klökkuö iökã as kè ikulirttsã es. ¹⁶Ñies a' erblö kēkraë Skëkëpa Jesús mik, e' dör wēs ì tso' klöule ñippökwaqpa wã iulã a' shoë e' tsatkoie es. E' wa a' tò ì sulu kōs patkeke bé tò a' kï ese kōs wöklö'weraë. E' dör wēs kuaböt wönarke bö'ie uyeke ñippökwaqpa kï, e' wöklö'weke wöshteke ì tso' ie'pa wã iulã a' e' wa es. ¹⁷Skëköl tò a' tsatkeræ, e' bikeitsó a' tò kēkraë, e' dör wēs íyi daloie tkekeka ñippökwaqpa tò iwökir kï e' tsatkoie es. Ñies a' er múwã ie' ttè kï, e' dör wēs ie' Wiköl tabè es. ¹⁸Ì kōs a' tã ikió ie' a' tò ie' tò a' kìmè. Ie' tã a' ttó kēkraë iWiköl wa, kè ilo'yar yës. Ñies ie' a' ikió s'batse'r malepa kōs kï. ¹⁹Ñies ikió ie' a' tò ye' a' ttè mèitö wã pakè as ye' tò Jesús tté buaë blëulewã ká iaiaë, e' wã pakò kè suarta'. ²⁰Ye' patküle ttè buaë e' pakök, erè i'ñe tã ye' tso' wöteulewã s'wöto wé a' ttè e' kuëki. A' ikió Skëköl a' ye' kï as ye' tò iwã pakò buaë kè suarta'.

Pablo e' chéat

²¹⁻²²Ye' kï ikiane tò a' wã ijcher tò is ye' tso' ena ì weke ye' tò. E' kuëki ye' tò yëkkuö i' patkeke Tíquico ulã a. Ie' dör s'yami dalër taië sa' éna. Ie' dör Skëkëpa Jesús kanè méso yësyësë ese. Ie' tò a' a' ichèmi tò is ye' tso'. Ñies ie' tò a' er diché ièmi.

²³Skëköl dör S'yé ena Skëkëpa Jesucristo as e'pa tò sene bèrè mù s'yamipa kōs a. Ñies as Skëköl tò ie'pa kìmù ñi dalërítsök buaë. Ñies as ie'pa erblö Skëköl mik kēkraë. ²⁴As Skëköl er buaë chò wépa éna Skëkëpa Jesucristo dalër kēkraë kè manerta'ttsã esepa kōs a.